

Autornan local ta masha limita pa publica su obranan

Te hasta nan originalidad ta den peligro

ORANJESTAD – Nos autornan local ta hopi vulnerabel pa protege originalidad di su manuscrito; y cualkier ayudo financiero ta masha limita pa nan por produci nan obranan. Durante un entrevista sr. Manchi Hennep, kende ta autor di dos buki y uno mas cu pronto lo sali riba mercado, a muestra su decepcion pa e poco sosten cu e gremio di escritor tin pa publica nan obranan.

Sr. Hennep ta señala cu tin fundacion como Charuba cu ta bisa cu ta yuda nos escritornan, pero ora cu e autor ta bay cerca nan cu un manuscrito, e autor tin cu pasa un caminda hopi largo. E ta haya cu den su concepto hopi personal, nan ta pone hende pa lesa e manuscrito, anto pa husga e manuscrito tambe, esta si ta apto si of no. Sinembargo e ta haya cu e hendenan ey no tin e nivel di estudio pa realisa e tipo di trabou di evaluacion aki.

El a bisa cu pa su propio experiencia -ya cu el a pasa den dje- den un instancia un persona educa ta bisa cu e buki no ta apto; y despues e mesun manuscrito ta ser hiba na otro persona hopi educa tambe cu despues di lesa e buki ta bisa: "E buki aki ta bon..." E ta haya cu e forma cu e manuscrito di un autor ta ser evalua actualmente ta hopi subhetivo, ya cu no tin un criterio defini.

E ta haya cu si un persona ta e doño di e compania, e mester evalua si e obra ta bon of no. Sr. Hennep no ta haya correcto cu un otro persona ta bay dicidi riba e punto importante aki. Ya cu mientras

un hende ta bisa cu e manuscrito no ta bon; otro opinion independiente ta bisa cu e manuscrito ta bon, pues no ta existi un hustificacion transparente y defini ora cu un manuscrito di un autor ta ser pone na consideracion di un empresa pa publica nan.

Sr. Manchi Hennep ta bisa cu el a dicidi como autor di libra su mes di e parti ey. Actualmente el a dicidi di cana otro caminda pa asina produci su obra "Ursula" cu lo ser presenta oficialmente diamars 7 di juni na cura di departamento di Arubiana di Biblioteca Nacional Aruba.

ORIGINALIDAD DEN PELIGRO

E ta kere cu e decision aki ta yuda pa salvaguardia integridad y originalidad di e autor su obra.

Durante un entrevista sr. Manchi Hennep, kende ta autor di dos buki y uno mas cu pronto lo sali riba mercado, a muestra su decepcion pa e poco sosten cu e gremio di escritor tin pa publica nan obranan.


El a bisa cu el a pasa pa e circunstancia aki, ya cu den pasado e tabatin problema pa un hende por a publica un buki di dje. E biaha ey el a bay cerca sr. Lio Booi ya cu e tambe ta autor, pa sr. Booi dune consejo, ya cu un instancia kier pa un persona educa lesa su buki. Y e consejo cu el a haya for di dr. Lio Booi tabata: "Lagami bisabo un cos, ora mi ta skirbi algo niun hende ta cambie. Ami kier asina aki, bo ta acepte of bo ta nengue".

Sr. Hennep ta declara cu e

consejo aki di sr. Booi a dune un forsa, ya cu como autor e mester percura pa salvaguardia e originalidad di su creacion. "Si bo no tin nada contra lei di moralidad of di etica, no cambia nada den dje", asina e ta bisa. E ta acepta cu por tin cambio naturalmente riba e forma gramatical of di ortografia; pero riba e parti di contenido no. Pesey sr. Hennep ta haci uzo di e profesionalismo y experiencia di e linguista Ramon Todd-Dadare kende ta e corector oficial di e tres bukinan cu el a yega di produci durante e delaster 9 aña, despues cu el a produci su prome obra, esta "Buscando Felicidad" na aña 2002. "Ramon ta un persona hopi serio den su trabou" asina e autor a declara.

Di otro banda sr. Manchi Hennep ta haya importante pa bin cu un Asociacion di Autornan Arubiano, un asociacion cu ta percura pa defende interes di e escritor y promove encuentro entre nan mes. E ta bisa cu na Corsou ta existi un cu regularmente ta realisa encuentro of tertulia entre e autornan di e isla. Nan ta topa semper den un luga specifico pa asina comparti idea, consejo y sugerencia entre nan mes. Aki na Aruba nos tin diferente escritor pero cada un ta manera "un mundo ariba su mes".

Na Pos Chikito a ser crea "Hof Literario" pero e ta mire cu e ta hopi limita. Sr. Hennep ta haya importante pa organisa algo di un forma mas structura cu un fecha specifico y cu un luga fiho caminda tur escritor y tur hende den mundo di literatura por bin hunto. □



E autor Arubiano, sr. Manchi Hennep.

